

Hronika / Chronik

Izvještaj o radu Centra za balkanološka ispitivanja ANUBiH u 2017. godini

Tokom 2017. godine aktivnosti Centra za balkanološka ispitivanja ANUBiH uglavnom su bile usmjerene ka izdavačkoj djelatnosti. Za ostale planirane projekte i djelatnosti na planu naučnih istraživanja nedostajala su neophodna finansijska sredstva. Publiciranje i distribucija *Godišnjaka/Jahrbucha br. 45 za 2016. godinu* završeno je u toku prvih mjeseci 2017. godine. U toku drugog dijela godine radilo se na prikupljanju i obradi radova za novi broj časopisa *Godišnjak/Jahrbuch br. 46 za 2017. godinu* koji sadrži radove naučnika i naučnica iz Bosne i Hercegovine (Sarajevo, Brčko, Doboj, Travnik) kao i priloge iz Slovenije, Hrvatske, Njemačke, Australije, Srbije, Austrije i Crne Gore. Pripremu i štampanje Časopisa ponovno je podržao Njemački arheološki institut, ova puta njegovo Evroazijsko odjeljenje. Značajnu pomoć pružili su: Fondacija za izdavaštvo Sarajevo, Federalno ministarstvo obrazovanja i nauke, kao i Ured austrijske kooperacije za nauku, obrazovanje i kulturu u Sarajevu. Centar za balkanološka ispitivanja je zahvalan navedenim institucijama na pruženoj podršci zahvaljujući kojoj je nastavljeno s održavanjem kontinuiteta izdavanja Časopisa.

Zahvaljujući naporima direktora Centra, akademika Dževada Juzbašića, kao i izvršnim organima Akademije nauka i umjetnosti Bosne i Hercegovine, u 2017. godini osigurana su neophodna sredstva, tako da je u ovoj godini objavljena obimna i vrijedna publikacija *Izvori za historiju srednjovjekovne Bosne I/1 i I/2 (Ispisi iz knjiga zaduženja državnog arhiva u Dubrovniku 1365–1521)*, čiji je autor član Centra, prof. dr. Esad Kurtović. Objavljena građa obuhvata vremenski period od 1365. do 1521. godine i sadrži značajne informacije za proučavanje historije srednjovjekovne Bosne. Osim popunjavanja praznina, publikacija omogućuje nova istraživanja i proučavanja podataka neobjavljene građe Državnog arhiva u Dubrovniku. Dio finansija (3.000,00 KM) osiguran je putem konkursa kod Fondacije za izdavaštvo Sarajevo u 2015. godini, Vijeća ministara Bosne i Hercegovine i preostalim sredstvima iz fonda Akademije nauka i umjetnosti Bosne i Hercegovine.

U toku 2017. godine održan je jedan sastanak sarajevskih članova Centra za balkanološka ispitivanja i Redakcije *Godišnjaka/Jahrbucha*. Sastanak je održan 6. marta 2017. godine uz prisustvo domaćeg člana ANUBiH i urednika časopisa prof. dr. Blagoja Govedarice, prof. dr. Adnana Busuladžića, prof. dr. Esada Kurtovića i vanjske saradnice Centra mr. sci. Melise Forić Plasto. Početkom sastanka članovi su odali počast rano preminulom dopisnom članu ANUBiH i članu Centra, prof. dr. Dubravku Lovrenoviću. Na sastanku je razmatran izvještaj o radu Centra u 2016. godini, gdje su pomenuti projekti Centra za balkanološka ispitivanja i izdavaštvo u okviru Centra. Također, razmatran je plan rada za 2017. godinu s naglaskom na održavanje kontinuiteta izdavanja časopisa *Godišnjak/Jahrbuch* i na izboru novih članova Centra. Nažalost, tokom 2017. godine Centar je izgubio tri zaslužna člana: prof. dr. Dubravka Lovrenovića, prof. dr. Nikolu Tasića i prof. dr. Bernharda Hänsela, nakon čega je pokrenut proces izbora novih članova. Na sastanku 6. marta predloženo je pet novih članova: prof. dr. Lejla Nakaš, prof. dr. Aleksandar Palavestra, doc. dr. Aiša Softić, doc. dr. Adnan Kaljanac i dr. sci. Aladin Husić. Nakon dobivanja saglasnosti od predloženih članova i od članova Centra, prijedlog je upućen u dalju proceduru u okviru Akademije nauka i umjetnosti BiH koja je na sjednici Predsjedništva ANUBiH 15. 11. 2017. godine uspješno okončana. Time su predloženi kandidati postali punopravni članovi Centra za balkanološka ispitivanja ANUBiH.

Na spomenutom sastanku Centra aktuelizirana je ranija inicijativa za povrat arheološkog materijala koji se nalazio u Zemaljskom muzeju Bosne i Hercegovine u Sarajevu. Materijal je 1998. godine predat Muzeju na privremeno čuvanje. Primopredaja je obavljena 5. 6. 2017. godine. Preuzeti materijal sačuvan je 80-ih godina prošlog vijeka s iskopavanja koja su se održala pod vodstvom prof. dr. Blagoja Govedarice na lokalitetima Kadića brdo, Ilijak i Pogana glavica. Materijal je privremeno bio deponiran u Odjeljenju za arheologiju Zemaljskog muzeja Bosne i Hercegovine.

Centar se u 2017. godini pridružio Projektu obilježavanja Nacionalnog dana svjesnosti o bibliotekama s programom *Prezentacija zbirke Centra za balkanološka ispitivanja*. Zbirka je predstavljena prisutnim studentima

s Katedre za arheologiju Filozofskog fakulteta u Sarajevu, kao i drugim zainteresiranim posjetiocima. Prezentacija zbirke održana je 8. 9. 2017. godine, s napomenom da je ova zbirka uvijek bila otvorena za korištenje, a dodatno je promovirana zbog bogatstva njenog fonda.

Dana 20. septembra 2017. godine u prostorijama ANUBiH je održana promocija najnovijih izdanja Centra za balkanološka ispitivanja. Voditelj promocije bio je prof. dr. Blagoje Govedarica, a promovisan je *Godišnjak/Jahrbuch br. 45 za 2016. godinu*, čija je promotorica bila dr. Andrijana Pravidur, načelnica Odjeljenja za arheologiju Zemaljskog muzeja Bosne i Hercegovine. Također je promovirana publikacija *Izvori za historiju srednjovjekovne Bosne I/1 i I/2 (Ispisi iz knjiga zaduženja državnog arhiva u Dubrovniku 1365–1521)* prof. dr. Esada Kurtovića, čiji je promotor bio dr. Emir O. Filipović, docent na Odsjeku za historiju Filozofskog fakulteta u Sarajevu. Promociju je otvorio predsjednik ANUBiH, akademik Miloš Trifković, a uvodnu riječ je imao direktor Centra, akademik Dževad Juzbašić.

S obzirom da je prof. dr. Esad Kurtović na lični zahtjev istupio iz Redakcije časopisa *Godišnjak/Jahrbuch*, ukazala se potreba za obnovom i proširenjem Redakcije. Na sastanku uže redakcije održanom 22. septembra akademik Dževad Juzbašić i prof. dr. Blagoje Govedarica predložili su sljedeće članove: dr. sci. Aladin Husić, prof. dr. Lejla Nakaš i doc. dr. Aiša Softić. Prijedlog je upućen članovima Centra na usaglašavanje.

Planirano je da se u narednom periodu započne realizacija treće faze projekta *Kartoteka grobova prastanovnika zapadnog Balkana* koja podrazumijeva sređivanje i uvezivanje podataka radi bolje pretraživosti, sistematizaciju i web prezentaciju. Za dovršetak ovog projekta neophodno je pronaći odgovarajuća finansijska sredstva.

U okviru saradnje s Institutom za arheologiju pri Filozofskom fakultetu u Sarajevu, tokom mjeseca oktobra, prof. dr. Blagoje Govedarica i saradnica Centra Sabina Vejzagić učestvovali su na probnim arheološkim istraživanjima nacionalnog spomenika *Arheološko područje-prahistorijsko naselje u Butmiru, općina Ilidža*. Istraživanja su trajala 10 dana pod vodstvom doc. dr. Adnana Kaljanca.

Sabina Vejzagić